

Protocol no. 65
Sezzüda da gövqia, als 23 mai 2013 20.00 - 23.30

Preschaints: Albert Mayer, Andri Poo, Men Caviezel, Dumeng Jann, Marianne Werro-Lehmann e Marco Fallet (protocol)

Protocol

Il protocol no. 64 da la sezzüda da marcurdi, als 8 mai 2013 vain approvà.

578 021 FABRICA
Din Stalvies; parcella nr. 956 Sot Crusch; mantegnimaint e renovaziun remissa

La cumischiun da fabrica ha examinà la dumonda e tuotta documainta ais avantman. Sün proposta da la cumischiun decid'il Cussagl da till'inoltrar a l'uffizi chantunal a Cuira pel proceder dal BAB.

579 021 FABRICA
Jachen e Maria Benderer; ingrondimaint stall'existentia Spinatscha

La cumischiun da fabrica ha examinà la dumonda e tuotta documainta ais avantman. Sün proposta da la cumischiun decid'il Cussagl da till'inviar a l'uffizi chantunal a Cuira pel proceder dal BAB.

580 021 FABRICA
Domenic Bass; fanestra da tet chasa d'abitar a Stron

Il Cussagl conced'il permiss per realisar üna fanestra nouva i'l tet da la chasa d'abitar.

584 790.501 Proget planisaziun cumünala
Parkegi public suotterran a Curtinaglias

La cumischiun da planisaziun prevezza i'ls contuorns da Curtinaglias da concepir ün perimeter per üna chasa da parcar suotterrana. I s'inclegia, ch'actualmaing nun ais la realisaziun da quella ingün tema. I va però actualmaing unic pell'integraziun da quai i'ls plans da preexaminaziun pella revisiun da la planisaziun cumünala per üna zona per fabricats publics suotterrana. Il Cussagl repassa la proposta e tilla fa buna. Uschè po gnir cuntinà cul proceder in fatschenda.

**585 790.501 Proget planisaziun cumünala
Zona per indigens a Palüzot**

Il schef da fabrica, Dumeng Jann, orientescha, chi saja ün fat allegraivel, cha tuots possessurs da parcelas da la nouva zona in Palüzot han firmà e retuornà las decleranzas d'intenziun. La cumischiun da planisaziun ha surdat al planisader, Orlando Menghini, d'integrar quai i'ls plans culla premissa, cha'l Cussagl fa bun quai. Il Cussagl decida da far bun il proceder previs.

**587 620.314 Mantegnimaint vias
Proget sanaziun via da god Muschna / Val Gronda – traget
Surains – Posa da las chavaras / surdatta da las lavuors
d'impressari**

L'uffizi da god e privels da la natüra dal Grischun meridiunal, Zuoz vaiva pretais las offertas e tillas evaluadas. Quel surdà uossa la fatschenda al Cussagl pella surdatta da las lavuors.

Il Cussagl decida, cun vusch unanima, da surdar l'incumbenza a la ditta Koch, Ramosch pel predsch d'offerta da fr. 134'690.15.
Quell'offerta ais economicmaing la plü favuraivla.

**588 620 VIAS E PLAZZAS
Werner Graf; dumonda per depositar ün rimorch a Sot Crusch**

Il Cussagl discuta la fatschenda e riv'a la conclusiun ch'our in Sot Crusch regna dischuorden da divers deposits da veiculs, rimorchs e.o.p. Tuot quels deposits nu sun gnüts permiss e nu pajan neir na ingün fit. Uschè decid'il Cussagl da conceder a Werner Graf il permiss pel deposit da seis rimorch, però cul inchasch d'ün fit annual. Plünavant decid'el d'inchaschar da tuots ils oters depositurs medemmamaing ün fit annual pro veicul resp. utensil.

Il cusglier dal dicasteri, Men Caviezel, surpiglia da trattar la fatschenda culs tangats e da tils infuormar sur da la decisiun dal Cussagl a regard fit sco eir da provar da procurar per daplü uorden.

**589 620.669.02 Plazzas da parcar / Emilia Nogler
Problematica sortida da la garascha Avant Baselgia**

Emilia Nogler ha orientà, cha la piazza da parcar dal cumün, chi's rechatta plü o main visavi a la sortida da sia garascha, significha ün grond problem, causa cha quell'impedischa la sortida da sia garascha in cas chi's rechattà sün quella ün veicul parcà. Ultra da quai ha ella eir muossà via sülla situaziun dal vaschin, S. Puorger-Conti, il qual nun ha insomma ingüna pussibilità da sortir da sia garascha in cas sch'ün veicul ais parcà sülla piazza, be daspera.

Il schef da fabrica, Dumeng Jann, surpiglia d'examinar la fatschenda in fond eir la visita oculara giavüschada.

**591 801 MELDRAMAIN DA PASCULAZIUN E FUOND
Pendicularas Motta Naluns; stadi da la lingia da sauaziun**

Davart da las pendicularas Motta Naluns vain orientà in scrit, cha'l stadi desolat da la lingia da sauaziun da l'indriz d'innaiver nu po uschè plü gnir acceptà. Da lur vart ais gnü constatà, cha l'inchasch d'aua ais plain sablun e glera. Implü rendan quels attent, ch'avant cha l'indriz vain dovrà pella sauaziun sto quel gnir tut giò davart las pendicularas, uschgliö nu das-ch'il sistem d'innaiver gnir utilisà in ingüns cas per sauar.

Il cusglier dal dicasteri, Men Caviezel, orientescha, chi saja gnü installà l'on passà ün filter e cha quista pretaisa nu saja bain probabla. I nun ais cuntshaint d'ingionder cha la glera vain. La fatschenda vain uossa trattada culs respunsabels da las pendicularas.

592 710

AUA DA SARINERA

Flurina Jann; problematica scul da tualettas i'l aual da Palüzot

Flurina Jann ha protramiss fotografias sur dal stadi pro l'aual da Palüzot. In basa da quellas as po il Cussagl far ün purtret sur da la situaziun chi demuoss'ün purtret pac allegraivel. Cun charta accumpognatorica rend'ell'attent, cha fingià avant bundant 10 ons d'eira gnü muossà via sün quella situaziun.

Il Cussagl decida d'intervenar subit in fatschenda e da provar da chattar, in basa d'ün sistem da controlla, d'ingiò cha'l scul da tualetta deriva.

593 620.314.02

Mantegnimaint general da vias

Catram aintasom Sur En vers Uina / dumonda da credit da fr. 8'000.00

Il vicecapo, Andri Poo, orientescha chi's tratta qua amo d'üna pendenza. Il traget da la Posta a Sur En vers Uina – fin pro la sculptura sto gnir catramà sün üna lunghezza da ca. 80 m. Ils abitants vaivan reclomà sur dal nosch stadi da la via.

Il Cussagl decida d'effetuar quellas lavuors e conced'il credit bsögnaivel da fr. 8'000.00.

594 2

SCOLAZIUN

Nouva ledscha da scoula

Il vicecapo e cusglier dal dicasteri, Andri Poo, infuormescha lasupra. La nouva ledscha da scoula van missa in vigur sül principi dal nouv on da scoula 2013/14. El manzuna seguaints puncts:

- Uris da bloc e maisa da mezdi: Ils genituors sun gnüts confruntats culla dumonda a regard bsögn. Prosmamaing as saja lura da che volüm chi's tratta.
- Finanzas: La nouva ledscha pretenda nouvs contrats da lavur culla magistraglia. Fin da qua retraiv'il magister la paja per ün on da scoula fin e cun il mais avuost. Nouv ais previs cha l'ultim mais da l'on da scoula saja il mais lügl. Quel tagl sto gnir fat dal 2013 ed ha per consequenza, pel mumaint, ün augmaint dals cuosts da pajas, chi vain però recumpensà al mumaint ch'ün magister sorta dal contrat resp. va in pensiun.

595

DIVERSAS SCHEFS

Rendaquint cumüna 2012

Il Capo suottametta seguaints termins a conferma:

Revisiun dal quint 2012:	<i>28 e 29 mai 2013 (cumischiun sindicatoria)</i>
Dumondas e.o.p.	<i>03 gün 2013 (cumischiun sindicatoria e Capo)</i>
Sezzüda da rendaquint:	<i>18 gün 2013 a las 09.00h (Cussagl, cumischiun sindicatoria, contabel, silvicultur e manader tecnic)</i>
Radunanza da rendaquint:	<i>04 lügl 2013</i>

596

ORIENTAZIUNS

Parcella cumünala nr. 539 in Palüzot

Jon Lansel vaiva demischiunà la fittanza da quella d'utuon 2012. Quella ais lura gnüda publichada i'l Mas-chalch, però i nu sun entradas ingünas annunzchas. I vain decis da surdar la cultivaziun da quella parcella a Dumeng Jann, chi posseda sia parcella be dasper quella.

PEB / invid a la radunanza regionala

Quella ha lö in mardi, als 28 mai 2013 a las 14.00 a Lavin. I fa part il Capo, Albert Mayer.

Radunanza Circul dal register

Quella ha lö als 28 mai 2013 a las 11.30. I fa part il Capo, Albert Mayer.

Radunanza generala da la Viafier Retica

Quella ha lö als 7 gün 2013 a Lavin. I fa part il Capo, Albert Mayer.

Access pro J. A. Schmidt e G. Salamon

Men Caviezel orientescha. La via d'access sto là gnir schlargiada per cha'ls duos manzunats rivan pro cun maschinas plü largias. Ils cuosts van suot mantegnimant da vias.

Silvicultur / cuors da giarsuns

Men Caviezel orientescha: Il silvicultur, Mario Riatsch, realisescha darcheu (proget Valtelina 2) cuors per giarsuns.

Sala cumünala

Marianne Werro, cusgliera dal dicasteri, mett'indiscussiun schi nus vuelss acquistar ün microfon movibel per las radunanzas cumünalas. I's vain a la conclusiun, chi'n cas da bsögn po gnir üttilisà eir quel da la chasa da scoula.

L'actuar:
Marco Fallet

Il Capo:
Albert Mayer

Las trattativas nr. 581, 582, 583, 586 e 590 nu vegnan publichadas, causa cha quellas nu sun amo madüras pella publicaziun (cas da fabrica e planisaziun).